



Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 171. Zakona o socijalnoj zaštiti, zaštiti civilnih žrtava rata i zaštiti porodice sa djetom („Službene novine Kantona Sarajevo“, broj: 38/14- prečišćeni tekst, 38/16, 44/17, 28/18, 52/21, 40/22 i 13/25), člana 19. stav 1. tačka 4. i člana 141. stav 3. Statuta Općine Novo Sarajevo („Službene novine Kantona Sarajevo“, broj: 5/20- prečišćeni tekst i 20/20- ispravka) i člana 16. stav 2. tačka d. Odluke o izvršavanju Budžeta Općine Novo Sarajevo za 2026. godinu („Službene novine Kantona Sarajevo“, broj: 1/26), Općinsko vijeće Novo Sarajevo, na nastavku 11. redovne sjednice, održanom dana 17.03.2026. godine, donijelo je

PRAVILNIK za jednokratnu novčanu pomoć porodicama za rođenje prvog/drugog djeteta

Član 1. (Predmet)

Ovim Pravilnikom utvrđuju se uslovi, visina pomoći i način ostvarivanja prava na jednokratnu novčanu pomoć porodicama sa područja Općine Novo Sarajevo za rođenje prvog i drugog djeteta.

Član 2. (Gramatička terminologija)

Gramatička terminologija korištenja muškog ili ženskog spola podrazumjeva uključivanje oba spola.

Član 3. (Cilj)

Cilj lokalne zajednice je da se kroz djelovanje u sistemu socijalne zaštite izdvajanjem budžetskih sredstava stvore bolji uslovi za porodični život i pronatalitetnu politiku.

Član 4. (Izvor finansiranja)

- (1) Sredstva za dodjelu jednokratne novčane pomoći utvrđuju se u Budžetu Općine Novo Sarajevo za svaku kalendarsku godinu, a u skladu sa finansijskim mogućnostima.
- (2) Raspodjela novčanih sredstava za dodjelu jednokratne pomoći za rođenje prvog/drugog djeteta vršit će se do utroška raspoloživih sredstava u Budžetu Općine Novo Sarajevo za tekuću godinu.

Član 5. (Uslovi za ostvarivanje prava na jednokratnu novčanu pomoć i visina pomoći)

- (1) Pravo na jednokratnu novčanu pomoć mogu ostvariti porodilje za rođenje prvog odnosno drugog djeteta, bez podnošenja zahtjeva, pod uslovom da su ostvarile pravo na porodijsku naknadu putem nadležne Službe.
- (2) Isplata novčane pomoći u iznosu od 200,00 KM izvršit će se jednokratno na tekući račun porodilje.

Član 6. (Način realizacije)

- (1) Nakon utvrđivanja ispunjavanja uslova propisanih članom 5. ovog Pravilnika, na prijedlog Službe Općinski načelnik će donijeti Zaključak o dodjeli novčane pomoći porođiljama za rođenje prvog/drugog djeteta.
- (2) Služba za socijalna pitanja, zdravstvo, izbjeglice i raseljena lica, u svrhu uplate sredstava na tekući račun porođilja, dostavit će Službi za privredu, budžet i finansije, prijedlog za dodjelu jednokratne novčane pomoći Rješenja o ostvarenom pravu na porođiljsku naknadu, te Zaključak koji će sadržavati sljedeće podatke: ime i prezime korisnice, broj tekućeg računa banke na koji se vrši uplata odobrenih sredstava i iznos za uplatu.
- (3) O realizaciji sredstava, po odredbama ovog Pravilnika, Općinski načelnik informiše Općinsko vijeće jednom godišnje.

Član 7. (Stupanje na snagu)

- (1) Ovaj Pravilnik stupa na snagu osmog dana od dana objavljivanja u „Službenim novinama Kantona Sarajevo“.
- (2) Pravilnik će se objaviti na Oglasnoj ploči i službenoj web stranici Općine Novo Sarajevo.

Broj: 02OV-01-1-1215/26
Sarajevo, 17.03.2026.godine

